

Mahathir alukan jaminan tidak usik perairan Asean

PM Jepun jelas sebab tentera diperbesarkan

Dari ABU BAKAR ISMAIL

TOKYO, Isnin — Perdana Menteri Jepun, Encik Yasuhiro Nakasone hari ini memberi jaminan langkah meningkatkan keupayaan pertahanan negeranya hanya untuk melindungi setiap inci pantai Jepun dari sebarang ancaman terhadap keselamatannya.

Jaminan itu diberi ketika berunding selama sejam dengan Perdana Menteri Malaysia, Datuk Seri Dr Mahathir Mohamad di Istana Akasaka di sini.

Turut sama dalam rundingan pusingan pertama ialah Menteri Luar, Tan Sri Ghazali Shafie dan Menteri Jabatan Perdana Menteri, Datuk Abdullah Ahmad Badawi. Di pihak Jepun pula selain Perdana Menteri ialah Encik Shintaro Abe, Menteri Luar dan Encik Masaharu Gotoda, Setiausaha Kabinet Jepun.

Pada umumnya, menurut Ketua Setiausaha Kementerian Luar, Tan Sri Zakaria Ali, kedua pemimpin itu membincangkan soal-soal antarabangsa dan perdagangan dan bersetuju membincangkan soal-soal hubungan dua hala esok.

Tan Sri Zakaria menerangkan, Encik Nakasone menjelaskan Jepun berhasrat meningkatkan keupayaan pertahanannya bagi membolehnya memberi perlindungan lautan laut Jepun seluas 1,000 batu dari kawasan pantainya.

Bellau menekankan, menurut Tan Sri Zakaria, kawasan yang hendak dilindungi itu tidak akan diperluaskan hingga ke Taiwan mahupun ke Filipina atau sehingga Guam di Lautan Pasifik.

Jerangkap samar

Dasar hendak meningkatkan keupayaan pertahanan Jepun itu tidak terkeluar dari peruntukan perlembagan Jepun yang menolak peperangan, angkatan tentera dan kebenaran untuk bentuk pertahanan secara kolektif.

Jepun, seperti yang diketahui, kini hanya mempunyai satu angkatan bersenjata yang diberi nama Pasukan Pertahanan Diri Jepun (Japan Self Defence Force).

Datuk Seri Dr Mahathir, menurut Tan Sri Zakaria Ali, puas hati dengan penjelasan yang diberi oleh Perdana Menteri Jepun itu.

Datuk Seri Dr Mahathir menerangkan kepada Encik Nakasone, Malaysia kini berjuang menentang komunis dan tentera Malaysia hingga sekarang pun masih menghadapi ancaman jerangkap samar yang dipangas oleh komunis.

"Malaysia mesti menunjukkan ia berupaya menentang komunis. Dan untuk membuktikan hal itu, kita perlu mempunyai kestabilan, pertumbuhan ekonomi dan meyakinkan rakyat bahawa kita boleh meningkatkan kedudukan kita dalam sebuah negara bukan komunis secara kita sendiri," kata Perdana Menteri.

Dalam hubungan itu, kata Datuk Seri Dr Mahathir,



■ Encik Nakasone... hubungan lebih penting.

Malaysia perlu membelanjakan sejumlah wang yang banyak bagi pembangunan dan Malaysia sungguh berhati-hati dan bijak membelanjakan wang sejumlah besar itu untuk pembangunan negara.

Dengan itu, apa yang dibuat oleh Malaysia juga boleh memberi manfaat kepada lain-lain negara di rantau ini, kata Perdana Menteri Malaysia, menurut Tan Sri Zakaria Ali.

Seterusnya, Tan Sri Zakaria Ali menerangkan, Encik Nakasone menghargai apa yang dilakukan oleh Malaysia.

Datuk Seri Dr Mahathir dan Encik Nakasone juga bersetuju agar dunia membuang dasar perlindungan dan mengekalkan sistem perdagangan bebas.

Kedua pemimpin itu juga memandangkan berat keadaan ekonomi dunia sekarang, khasnya yang menjejaskan perdagangan antara negara-negara maju dan sedang membangun.

Datuk Seri Dr Mahathir kesal dengan sikap banyak negara yang di satu pihak menegakkan sistem perdagangan bebas, tetapi di waktu yang sama juga menggunakan dasar-dasar perdagangan yang bertentangan dengan kebebasan perdagangan.

Datuk Seri Dr Mahathir berkata, beliau ingin melibetkan dasar perlindungan itu dibuang dan berharap Jepun, khususnya, akan membuka pasarannya untuk barangan buatan Malaysia.